

光緒江西通志

江西通志

卷首之二

訓典

雍正十三年十月癸酉

上諭總理事務王大臣江南江西湖廣等省正供錢糧款內有
蘆課一項凡蘆洲俱係沿江沙灘坍漲靡定是以定例五年
一丈量令地方官踏勘新舊坍漲沙地據實報聞而不肖官
吏往往借此納賄行私已坍之地不得豁除正賦新漲之區
反可脫漏升科此種積弊甚爲民害嗣後屆期丈量著該督
撫於通省道員內選廉能素著者率同該州縣官履畝清查
凡有疏縮俱按現在實數升除毋使漏課亦毋使賠糧其不
肖官吏或尙有借端需索等弊卽行指名叅處不得姑容徇

庇自干咎戾

乾隆元年五月丙午

上諭總理事務王大臣朕聞江西地方土瘠民貧率多勤儉謀生安分自守惟山縣鄉村常有兇蠻爭角動輒統眾毒毆將人活埋斃命者如南昌府屬之靖安臨江府屬之新淦贛州府屬之信豐等縣尤甚且信豐地方山村鄉鎮有等豪蠻私立禁約規條碑記貧人有犯並不鳴官或裹以竹箋沈置水中或開掘土坑活埋致死勒逼親屬寫立服狀不許聲張似此種種慘惡駭人聽聞皆從前地方官員失於化導禁約以致村野兇暴藐法橫行若果係奸宄不法之徒自當呈送官長治以應得之罪豈有鄉曲小人狂逞胸臆草菅人命之理著該省文武大員通行曉諭嚴加禁止倘有不遵諭禁仍蹈

前轍者卽行嚴拏從重定擬不少寬貸

乾隆元年五月丁巳

上諭總理事務王大臣朕聞江南江西湖廣地方襟江帶湖廣袤數千百里設立塘汎所以衛商民防盜賊也近訪得不肖兵丁疏懶廢弛養盜貽患受其規禮分其贓物爲之聲援嚮導及細求其故多因兵丁攜帶家口安土重遷與地方奸匪往來熟識以致事前無忌事後無蹤放膽游行竟成盜賊之淵藪夫汎兵頻數更替出其不意則與賊無從結識有縱賊之咎無夥賊之利亦何樂乎爲此顧任其挈妻孥飽谿壑萑苻多警鈴柝空存徒法不能以自行非此之謂歟朕又聞江岸湖邊船隻成羣任意攬載奸良莫辨商民被劫所在多有雍正五年定例令地方官取具船戶鄰佑保結編列號次刊

刻姓名給以印照不時稽查而漁船出沒無定藏奸更易亦依陸地保甲之法許以公首懲以連坐乃日久怠忽總不奉行夫弁兵竭力防緝則盜賊不致蔓延船戶隨在清查則盜賊無由混雜然必須封疆大吏刻刻留心時時察訪規條賞罰整肅嚴明方能著有成效至汛兵更替之法尤當因地制宜俾兵丁得顧其室家而汛地仍資其防衛是又在封疆大臣實心區畫善爲經理不徒在文告之虛辭也著各該督撫悉心詳議奏聞

乾隆元年五月江西巡撫俞兆岳奏報贛州建昌等府山水暴漲情形

上諭如此數處皆被水災亦不爲不重大矣切不可諱災掩飾視同朕外朕每見外省奏報卽係小災亦必儆戒自省不知

汝等督撫如何居心耳然地方之災祲在所不免而人力之
補苴不可不盡若於被難之民賑恤有所不力致令災黎失
所則朕之譴責汝等不能逃也

乾隆二年正月庚子

上諭總理事務王大臣據原任江西巡撫俞兆岳奏報乾隆元
年九江贛州兩關稅課贏餘銀兩較前任減收九萬有餘此
事現已交與該部及新任巡撫岳濬查覆奏聞朕前因各省
關稅於正額之外每多無名之費恣意苛索苦累商民是以
降旨釐剔弊端將應行減除者概令禁止全在督撫大臣等
督率司權之員潔已奉公實力遵行以副朕輕徭薄賦加惠
商民之至意今就江西一省言之已少收銀十萬兩推之各
省則約計百有餘萬矣如果商民得霑實惠卽更逾此數亦

朕所樂聞有何吝惜但從來關榷稅務與百物價值原係相爲表裏如果關稅減輕則物價亦必平賤若稅輕而價仍不減羣情亦不能帖服此一定之理也今京師貨物日見騰貴而外省亦復不減於前是各關所減課銀商民並未霑被恩澤徒飽吏胥之囊橐耳我

皇考臨御以來澄清吏治凡此等官侵吏蝕之習久已弊絕風清今督撫諸臣如不能稽察屬員被其蒙混則庸懦無能有忝封疆之任若或已身稍有染指則名節有虧朕一經揅斥之後斷不復加錄用也可將此旨傳諭各省督撫令其各行稽查深自警省若錯會朕釐剔弊端藏富於民之意又欲多報贏餘以致商民受困識見鄙陋其罪更不可逭矣

乾隆七年七月癸未

上諭內閣今年糧船北上時適值河水淺涸各船盤撥加緯實
多繁費運丁力量艱難只得借支庫銀以爲歸途之用將來
照例扣除還項查江西南昌等幫借銀四千四百兩江南興
武等幫借銀一千七百零四兩揚州等幫借銀一千七百九
十二兩朕念今歲運丁艱苦甚於往年著將所借銀兩悉行
賞給免其扣還此係格外之恩後不爲例

乾隆七年七月江西巡撫陳宏謀奏請截留滇銅供鑄
上諭滇省銅効運京鼓鑄關係輦下錢法甚爲緊要從無外省
截留之例但念江西錢文太少錢價太昂較他省爲甚只得
爲權宜之計況目下戶工二部現有餘銅足供鼓鑄著照陳
宏謀所請應解戶工二部滇銅截留五十五萬五千効以濟
該省之用該省陸續赴滇採買仍著解京補項他省不得援

以爲例

乾隆十一年四月乙酉

上諭內閣向來江西省每逢編審之年丁男之外又有婦女蓋緣從前有鹽鈔一項分給小戶計口納鈔既有婦女應徵之項則不得不稽其存亡增減是以入於編審之內也今食鹽課鈔久經攤入地糧而該省尙循舊例辦理朕思從前照鹽納價編審尙屬有名今鹽鈔旣已攤入地糧之內則是婦女已無可徵之項何必存此編審虛名徒滋擾累嗣後編審婦女之處著行停止

乾隆十三年七月乙巳

上諭軍機大臣等江西巡撫開泰奏建昌府南豐縣奸民饒令德糾夥饒三超及宜黃廣昌二縣奸民蕭其能等於本年四

月內同往宜黃縣作關帝會將焚表之灰同雞血和入酒內
共飲是日在唐榮發家宰牛一隻豬三隻飲酒而散又訊據
三超供三月內饒令德與唐維瑞同往甯都縣有受劄之事
現因各犯供吐游移指扳之人多非的確嚴押解省窮究底
裏等語奸匪糾眾砍血散劄謀爲不軌深足爲患地方辦理
此等事件必赴機速而見事明奸民一無漏網無辜不致株
連若存息事之見亦成釀禍之由權其輕重酌以寬嚴始爲
妥協開泰自任巡撫以來於刑名錢穀事件尙能辦理而發
奸摘伏懲兇緝暴尙恐力有不逮此案若查辦失宜不特良
善難免牽累閭閻不無滋擾而羣匪狡脫奸謀益深地方且
屬緊要可傳諭尹繼善令其會同開泰留心確查詳加根究

不可有絲毫從寬之見亦不可有絲毫從嚴之見務期酌中妥辦俾無枉縱庶可補開泰之不及

乾隆十四年四月己亥

上諭內閣江西營伍向係兩江總督所轄去贛州南昌二鎮遠未能詳悉周知時加簡閱是以日漸廢弛巡撫阿思哈著兼提督銜令其就近管轄加意整頓仍聽總督節制

乾隆十四年九月庚午

上諭軍機大臣等據署江西巡撫彭家屏奏稱該省塘哨歲修銀兩向係州縣官領銀轉交營弁營弁不無從中侵蝕草率從事及全不修理等弊而州縣因塘汛亦在交代之內不得不葺修交給請嗣後并交州縣承修營弁出具收管等語塘房哨船關係緊要豈容文武彼此推諉自應妥酌定議以專

責成但彭家屏所奏文員獨任修葺營弁漫不在意之處措詞亦不無偏向文員著將原摺鈔寄黃廷桂令其詳悉妥議具摺奏聞

乾隆十七年二月乙未

上諭軍機大臣等雲南巡撫愛必達奏江西省傳鈔僞稿案內余有道供稱丁得升帶稿到店看過仍係丁得升帶去又據丁得升胞弟廷選供稱丁得升赴雲南省城貿易密咨查拏而丁得升堅供並無僞稿現在咨解江西質審完結等語愛必達乃據江西來咨辦理余有道丁得升均係一面之辭非面質無由得實但此案余有道乃原供之犯而丁得升之虛實尚在未定應將余有道解往雲南不應將丁得升解回江西蓋隔省咨提道路遼遠如原供或係挾仇誣捏卽據供咨

提則被扳者無論虛實先受長途押解之苦而原供之犯轉得安坐羈所遷延數月此狡犯妄供株連被累流弊之所由滋也嗣後如有此等供扳他往人犯一面密咨拘查候質俟本案情節逐一審明卽將原供之犯解往彼處質對則狡供者自知遠解之可畏不敢肆其仇扳拖累之奸謀方合折獄之道將此通行傳諭各督撫知之

乾隆十七年六月甲寅

上諭內閣前據給事中范廷楷查出江西鉛山等幫沿途使用陋規具摺叅奏已降旨交各督撫河漕提鎮逐一查叅治罪今漕運總督瑚寶來京朕命將南漕舊規分別應裁應給各款數目與軍機大臣等會議將各省漕船陋例詳查分別裁革立定章程通行曉諭遵守夫因事餽遺借端勒索均于禁

令況漕船事關天庾豈任不肖弁役恣行婪賄但據該總漕酌定規例章程之內卽有必不可盡革之處則從前各弁役雖借此侵漁而按其情罪究係相沿陋規與營私納賄者有間所有從前令該督撫河漕提鎮查叅治罪之處著加恩寬免朕辦理諸務輕重自有權衡裁制全無成見旣經查出弊端自應禁革而經管承辦必不可已之費亦當酌定條款俾知法守嗣後著各該管上司官員不時嚴行稽查如有不肖弁役或將已裁陋規私自婪收或於定數之外多行勒索卽據實嚴叅將與者受者一併治罪該管官不行揭報及上司徇隱不卽查叅別經發覺定將失察之該督撫提鎮等從重

治罪

乾隆十七年九月甲子

上諭軍機大臣等據總漕瑚寶奏稱江西省收買旗丁耗贈等
米應豫行咨會以便於漕船到淮時查覈等語此項耗贈米
石係給與該旗丁以爲盤剝折耗並沿途日食之需原不許
在次折乾而旗丁中之拮据者將米易銀以資盤費亦勢所
難禁鄂昌因該省米價昂貴循照陳宏謀所辦舊例官爲收
買備糶接濟自是因時調劑在上年歉收之後尙屬可行但
恐竟視爲常例則窮丁利於多得銀兩不復儲備而漕船北
上盤剝拋撒以及長途日食或致轉有不敷該地方官或因
此而私收本色仍復在次折給以圖省便均未可定可傳諭
該撫後如遇應行官爲收買年分自可隨時酌辦不必因噎
廢食但亦須定以限制毋任旗丁儘數多賣以致中途置乏
則濟軍惠民兩有裨益至地方官折收折給之事亦不可不

加意稽察勿令滋弊可耳其應如何咨會漕督以便查覈之處並令該撫酌量辦理

乾隆十七年十月癸巳

上諭軍機大臣等鄂昌奏南安府上猶縣匪犯何惡四等謀爲不軌一摺著鈔寄鄂容安令其速行前往接辦此等重案非鄂昌所能辦理鄂容安到日如首犯尙未就擒餘黨尙未淨盡應卽親往查辦現在交辦僞稿一事應提人犯自可專差委員查緝此必應親履其地周閱情形深山曠僻之地固易藏奸然非無地可容鋌而走險何遽爲此看來或係捏造僞稿之人自知法不容誅竄伏山林煽惑嘯聚或係馬朝柱夥黨魁以正國法亦未可定著傳諭鄂容安令其詳悉體察務渠魁以正國法亦未可定著傳諭鄂容安令其詳悉體察務

得根株據實具奏斷不可委之屬員草率了事也

乾隆二十四年閏六月丁未戶部議覆漕運總督楊錫
紱奏江西各幫額船七百八十隻請加一裁減前以請
裁江浙二省漕船經臣部議駁江西事同一轍應毋庸
議

上諭戶部議覆江西裁減漕船一案昨詢問楊錫紱據奏江西
幫船原與江浙等省不同可以通融裁減且於辦公有益著
卽照所請行

乾隆二十六年三月辛亥

上諭軍機大臣等胡寶瑔所奏江西省軍屯一事此等地方要
務卽素有幹濟之能者尙恐不能經理盡善況阿思哈在巡
撫中不過中材乎從前清理軍屯原以杜民戶欺隱屯軍典

賣爲恤丁濟運之長策而摺內不免舊額有加一語似有難以質言之處殊不明晰江西民俗素爲刁悍定議伊始自多浮議若任事者因此而旋議更張成何政體但如直隸查辦民典旗地一事令伊等自扣錢糧俸祿置爲己產且定有私行典賣治罪之條而旗人尙未必實能受益今以官贖之地徒手給與疲惡之丁將隨手花消以助其飲博糜費何所底止此項清出屯糧或應另行招募殷實良丁或應存貯公所遇糧艘有應用之項於此請給以資辦公方爲妥協應如何酌定章程及恤丁濟運作何通盤籌畫示之節制俾公私交便可以永遠遵行著該撫悉心妥議具奏

乾隆二十八年十月丙午

上諭內閣明德奏廣豐縣劣紳潘紀洙因家人張發偷竊銀物

遂疑裁縫晏文光通同竊逃稟報該縣林樹崑給票令其自
緝及潛紀洙補授浙江麗水縣知縣復差族弟執持原給緝
票又差麗水縣役給與印票來江西拏獲晏文光遞解至安
仁縣境內晏文光落水淹斃屢經飭令知府楊遇親提確審
該府輒轉委員辦理遲延而審擬情節又多未確一摺所奏
甚屬公正在籍紳衿不得於地方滋事律禁綦嚴我

皇考臨御十三年加意整頓暨朕御極以來因事創懲提撕儆
戒自宜人知畏法各思斂戢潘紀洙所失不過數十金乃以
影響疑似之事竟行持票自緝復敢於莅任以後將任內印
票給與伊弟暨縣役越境至本籍拘拏以致釀成人命殊屬
藐法無論晏文光之夥竊與否尙待察訊而身爲他省之縣
令輒敢拏本籍之民人若不嚴加懲治則地方一二劣紳朝

登一命之榮卽夕擅三尺之法此風斷不可長潘紀沫著革職及摺內有名人犯交與浙江巡撫熊學鵬委員一併解交江西巡撫明德嚴審定擬具奏

乾隆二十九年四月庚子

上諭內閣輔德奏江西訟案繁多率由府省地方斂金買產合族建祠不肖之徒妄起事端所至停宿訟徒開銷祠費甚至牽引遠年君王將相爲始祖荒唐悖謬不可究詰現在通飭查辦一摺所見甚爲正當民閒惇宗睦族歲時立祠修祀果其地在本處鄉城人皆同宗嫡屬非惟例所不禁抑且俗有可封若牽引一府一省遼遠不可知之人妄聯姓氏創立公祠其始不過借以釀資漁利其後驟至聚匪藏奸流弊無所底止恐不獨江西一省爲然地方大吏自應體察制防以懲

倣習況禮經所載大夫不得祖諸侯卽譜系實有可稽而地
望旣殊尙當遠嫌守分若以本非支派攀援竄附冒爲遙遙
華胄則是覬顏僭越罔知忌憚名教尙可貸耶各督撫等其
飭屬留心稽察實力整頓所轄之地如有藉端建立府省公
祠糾合匪類健訟擾民如江西惡俗者一體嚴行禁治以維
風紀而正人心毋得僅以文告奉行故事

乾隆二十九年九月癸亥

上諭軍機大臣等輔德奏查辦甯州還俗僧人盧秉剛一案議
將寺內田產撥出歸公仍餘二百餘畝給還養贍之處辦理
尙未允協盧秉剛以還俗僧人占寺爲室娶妻生子捐納職
銜移毀佛像鐘鼓并將寺中田廬據爲已有實緇流中之匪
類若不示以重懲則凡叢林住持不守清規者尤而效之勢

將何所底止況寺內租穀原爲常住香火之資住僧經營有年積贏阡陌乃係寺中餘息所出並非伊披雍時攜帶私資自行置買者又何必給令管業以遂其擁資自利之心乎其摺內所請給與養贍田二百餘畝著概行入官充公并將廬秉剛定擬發遣以示炯戒可將此傳諭輔德令其另擬具奏

乾隆二十九年九月癸亥

上諭內閣前江西德化等處因江水驟漲濱窪之地秋禾不免淹損已降旨將德化封一等三鄉及彭澤等五縣被水之地分別加恩撫綏今各該處積水雖次第消退可以補植秋禾而南昌等縣緊踞鄱湖之上其最低處所尙未能全行涸出秋種難期收穫民力不無拮据著再加恩將南昌新建進賢三縣未涸地畝卽照封一等三鄉之例一體概予獨賑該撫

速飭所屬實力妥辦務令均霑實惠副朕軫念閭閻至意

乾隆三十二年閏七月丁巳

上諭內閣前據高晉奏江西之德化德安湖口彭澤建昌新建等州縣內有被淹稍重之處業經降旨撫恤並令確勘妥辦今據吳紹詩奏南昌進賢鄱陽餘干瑞昌星子等縣其貼近江湖低田亦續被漫淹現在尙未涸出栽種無及等語南昌等各縣上年已聞被水淹茲復被偏災閭閻生計未免拮据朕心深爲軫念著該撫妥速加意撫恤嚴飭所屬履畝詳勘分別妥協辦理實力撫綏務俾窮黎均霑實惠不致稍有失所副朕軫恤至意

乾隆三十二年九月癸丑

上諭內閣江西省南昌新建進賢鄱陽餘干建昌都昌等七州

縣本年秋田偶被偏災業經降旨該撫令其加意賑恤分別
蠲緩更念此數縣連年被水民力倍爲拮据所有明歲輪免
漕糧著加恩豫行蠲免至本年應完漕糧仍緩至己丑年開
徵分作三年帶完俾災黎益得寬舒以副朕軫恤至意

乾隆三十三年正月庚寅

上諭內閣上年江西省南昌等一十三縣偶被偏災業經降旨
該撫等照例賑恤今念賑期已竣正值青黃不接之候貧民
口食未免拮据著加恩將南昌新建進賢鄱陽餘干星子建
昌德化德安等九縣被災七八九十分之極貧與被災九十
分之次貧各加賑兩個月被災七八分之次貧加賑一個月
其湖口彭澤瑞昌都昌四縣低田偶遇偏災情形較輕所有
被災七八九十分之極貧及被災九十分之次貧加賑一個

月該撫等其董率所屬實心經理務俾窮黎均霑實惠毋致
稍有失所

乾隆三十三年十一月庚子

上諭軍機大臣等聞江南江西等省民間行用制錢內多有攢
入翦邊小錢者雖經地方官查禁其風總未能止息此等匪
徒敢將制錢私自翦邊銷燬殊干法紀雖間有查出治罪者
不過民間零星使用究之伊等所翦錢邊碎銅非另鑄私錢
卽改造器皿售賣時必有蹤迹可尋若卽將零銅鎔化總賣
亦必有銅鋪向其收買市井細民安得盈千累百之銅其形
迹易於推究若於此嚴密訪拏方爲正本清源之道著傳諭
高晉彰寶馮鈴吳紹詩等卽督飭所屬實力上緊緝拏務將
窩主及售賣店家嚴行追訊使奸徒無從潛匿以杜根株毋

得僅以具文塞責

乾隆三十五年正月辛巳

上諭內閣上年江西濱臨江湖各州縣田畝閒被水災業經加恩分別賑恤並將應徵額賦酌予緩徵第念被潦稍重各屬值此青黃不接之時貧民未免艱於謀食著再加恩將南昌新建進賢鄱陽餘干星子建昌都昌德化德安瑞昌湖口彭澤十三縣被災九分十分之極貧加賑兩個月次貧加賑一個月其被災較輕州縣例不應賑但當歉收之餘蓋藏亦未能饒裕並著酌借籽種牛具俾得及時播種毋誤春耕該督撫等其董率所屬實力妥辦勿使官吏侵漁俾惠澤均霑副朕愛養黎元至意

乾隆四十一年十二月丁巳

上諭內閣戶部奏江西省安插土司撥給地畝價值與原定之數不符未便准銷應令該撫仍照定價召買造冊報部一摺已依議行矣此等土司均係曾經獲罪之人還撥各省安插已屬恩施格外該土司等既到安插省分又經撥給官房樓止尤得各有甯居至其餉口之資止須每名酌賞銀兩令其各自謀生以贍家口何必動項多購田畝分撥致滋糜費此案業經辦給田地毋庸追繳著交戶部存記嗣後如再有遷撥安插土司之事令該督撫遵照此旨辦理並將此諭令有土司省分及向曾安插土司省分各督撫知之

乾隆五十年七月庚午

上諭內閣前因步軍統領衙門奏江西廬陵縣生員郭榜呈控該縣修理事書生員彭賓等經理藉端派累銀兩及將不應

入傳之劉遇奇濫入志書將劉遇奇所作慎餘堂集呈首因
交薩載舒常秉公審辦據舒常奏委員起獲慎餘堂版片並
清風亭集鈔本一帙逐加校覈其中實有狂謬語句黏簽進
呈並將劉遇奇之元孫劉員位擎獲審訊從重辦理等語朕
將其書詳加披閱其簽出之處如對明月而爲良友吸清風
而爲醉侯清風明月乃詞人引用成語此而目爲悖妄則欲
將清明二字避而不用有是理乎至其餘簽出各處俱係
廟諱暨朕御名未經避寫無論劉遇奇係順治年間進士其人
身故已久安能豫知敬避卽現在鄉曲愚民其不知

廟諱者甚多豈能家喻戶曉卽偶有未經避寫亦無足深責此
而指爲語句狂謬將其子孫治以悖逆之罪則將來挾嫌告
訐之徒勢必吹毛求疵謬加指摘使人何所措手足耶此事

舒常辦理太過已有旨諭令將劉遇奇子孫省釋以免拖累
矣外間所著詩文果有如錢謙益呂留良等其本人及子孫
俱登贊仕而狂吠不法者自應搜查嚴辦若並非有心違悖
不過字句微疵朕從不肯有意推求所謂不爲已甚之素志
實天下人所共見共聞者前屢經降旨嚴切申諭而舒常尙
有此過當之語各省督撫文理不通者遇此等挾嫌控訐事
件恐不免拘泥太過任聽劣員庸幕謬加簽摘以致辦理失
當滋擾閭閻殊失朕不爲已甚之意於吏治民生大有關係
因劉遇奇一案再行明白宣諭知之

乾隆五十一年正月庚午

上諭內閣何裕城奏江西省市糧價值近日稍昂由江楚商民
販運過多所致等語上年江楚等省被旱成災收成歉薄全

賴鄰省米糧接濟商民均向江西四川等省販運糧石以資
口食費朕許多苦心節次降旨令各該省督撫寶力經理設
法調劑務俾商販流通不致稍有阻遏方為妥善今何裕城
因該省糧價加增歸咎於商民販運過多是意在遏糴此何
言耶民間遇有災歉自應以此省之有餘補彼省之不足爲
督撫者皆當以民食爲心不分此疆彼界籌辦得宜俾得均
勻接濟且鄰省到境採買小民等得價售賣可霑餘潤尙不
應稍有居奇何況封疆大臣迺竟存彼此之見耶前據李世
傑奏因商販赴川卽研動常平倉穀應糴所辦甚合機宜又
據舒常奏江楚等省商民赴該處販買米石官爲照料令其
迅速運回該督撫等皆能無分畛域辦理妥協是以將該督
撫等議敘何裕城甫經到任何以卽有商販過多之慮甚屬

江上錄卷之二
三
非是何裕城著飭行

乾隆五十一年正月庚午

上諭軍機大臣等據何裕城奏江西市糧價值稍昂皆由江楚商民販運過多所致等語意存畛域殊非封疆大臣之體至摺內所稱酌糶常平倉穀以裕民食一節前據李世傑奏因商販赴川礮動常平倉穀發糶接濟甚合機宜今江西省糧價稍昂該撫酌籌調劑何不卽將常平倉穀出糶鄰省所有糶價卽存貯藩庫以備將來價賤時買補歸倉似此一轉移間則鄰省既得資接濟而市價亦不致昂貴何裕城何計不及此耶著傳諭該撫嗣後務須遵照妥辦不得仍存畛域之見

乾隆五十三年八月辛卯

上諭軍機大臣等據何裕城奏江西省南昌饒州南康九江等

府屬因雨水過多沿江傍湖低窪田地間被淹浸現確加察勘分別被災輕重動項撫卹務俾均沾實惠又德興縣山水陡發衝失房屋並淹斃人口若俟歸案彙辦不免流離失所已飛飭該府齎帶銀項馳往照例撫卹妥爲安頓等語南昌等屬因雨水過多致低窪處所間有被淹目下節過處暑補種不及自應詳細查明分別辦理至德興縣因山水陡發衝失房屋並淹斃人口亟當速行賑濟何裕城飭令該府帶銀馳往撫卹安頓所辦尚是著傳諭該撫卹董率所屬加意撫綏務使貧民均霑實惠不可因係一隅偏災稍有疏忽致令失所

乾隆五十四年正月辛酉

上諭內閣上年江西饒州九江等府屬秋禾被淹成災節經降旨令該撫實力撫卹分別賑濟毋致一夫失所第念今春正賑已畢青黃不接之時民食恐不無拮据著再加恩將鄱陽餘干德興星子都昌德化德安瑞昌湖口彭澤十縣中之被災九分十分極貧災民加賑兩個月其九分十分災次貧八分災極貧及南昌新建進賢建昌四縣中之八分災極貧均加賑一個月以資接濟至成災五六七分及勘不成災地方並著該撫察看情形酌借口糧籽種該撫務督飭所屬實心經理俾災黎均霑愷澤以副朕惠愛閭閻普錫春祺至意

乾隆五十四年三月壬戌

上諭內閣翁方綱奏江西士子積習多於歲考知所儆惕而科考漸就懈弛蓋由報優報劣皆在歲考之時而科考於諸生

別無查察稍自怠廢者輒謂科考無關勸懲或至日久改轍之弊現飭各學教官將所管文武各生是否專心肄業之處於科試之年備造全冊每名下詳細註明入於交代冊內以備稽查各學報優之生如棄考不到及考到而文理荒疏者將其報優扣除仍將原報之教官查辦等語翁方綱之爲此奏不過見其隨事留心但江西既有此積習恐各省士風亦有似此者學政督飭士子原應歲科兩試並重若因歲試有報優劣之條而科試竟漫無稽查則文武各生其不能自愛者難保無怠廢改轍情事於學校殊有關係嗣後各省學政務宜實力整頓士習不特於歲試當秉公考覈卽科試之年亦當一律認真辦理覈實程材以副朕整飭士風之至意

乾隆五十四年六月丁巳

上諭內閣據書麟等奏江西袁州幫旗丁李周姚漢表軍船二隻行至黃河大溜陡遇大風掣斷錨纜船身側轉浪湧入艙兼以兩船撞擊登時散裂所有糧米板漂淌無存淹斃副丁姚繡聲等三名口等語旗丁李周姚漢表二船裝載重運正入黃河大溜之時猝遭風暴人力難施以致糧石漂沒淹斃人口殊爲可憫著加恩將該二船漂淌米石竹席板等件概行豁免其淹斃之副丁姚繡聲等三名口照例分別恤賞至該旗丁等漂散船隻並著給料成造以示體恤

乾隆五十四年七月庚戌

上諭軍機大臣等本日召見管幹珍據奏江西漕船開幫遲延皆由旗丁等應領新漕項下銀兩扣抵較多日見疲累因守領借項未能依限開行等語漕糧爲天庾正供從前立法之

始一切應給正項及軍田運費俱有一定章程本爲充裕旗
丁等足資用度輓運不致拮据行之日久從未聞有疲累難
行之事何以江西漕船必待領借官項始行開幫況此項借
給之銀如本年借銀二百兩來年卽應於所領項下扣還大
半其現年所餘之項自較上年更少勢必所借愈多如此年
復一年展轉扣抵各旗丁應領之項所存無幾將來不但運
費不敷卽船內應用篷繩等物亦必無資置買疲乏日甚長
此安窮卽云旗丁等應領運費不敷使用致逾開幫定限則
向來又如何辦理並無遲誤設此時竟不准借給豈該省漕
船遂不開行輓運耶江西一省如此他省漕船若俱藉項開
幫國家經費有常似此紛紛效尤於天庾正供豈不皆有遲
誤亦復成何事體從前鳳陽幫船因旗丁貧乏官爲籌項贖

回軍田俾得租項充裕以資運費迄今總無遲誤今江西幫
船如此疲累必係該旗丁等將衛地軍田私行典售租息無
出不能藉以幫貼運費以致日形竭蹶該督撫等所司何事
豈遂束手無策任其坐困耽延且該省可以動支款項甚多
何致一時未能籌辦使旗丁等得以藉口不行及早開幫此
事必須通盤籌畫設法辦理俾旗丁等日見起色不致仍前
延誤方爲妥善現在管幹珍押催回空到淮尚需時日著傳
諭書麟何裕城先行悉心籌酌妥議章程俟管幹珍到淮後
再行會同詳議據寶具奏

乾隆五十六年五月甲申

上諭內閣前據姚袞奏江西建昌府屬界連閩省之區私鹽路
徑較多堵緝稍難必須於各要隘添設卡巡一摺彼時以建

昌距淮南二千餘里離閩省邵武汀州等府不過二三百里運鹽程站較之淮南近至十倍其鹽價自必貴賤懸殊欲百姓之舍賤買貴舍近求遠於情理亦未平允何以從前定例時不將鄰閩府屬就近行銷並恐他省亦有似此者因降旨通諭各省督撫彼此酌商調劑使商民交便以省緝私之繁嗣據孫士毅等奏酌籌建昌府屬設卡巡緝章程朕恐有名無實且商人行銷鹽引利於就近而憚於遠行運鹽道路愈遠腳價愈增所費已屬不資若又添設卡巡多增費用不特病民而且病商復令長麟全德前往該處察看情形詳妥辦理昨又思無知小民惟利是圖祇知得尺則尺得寸則寸如建昌劃入閩省私販即可越過建昌沿及撫州南昌無所底止恐巡緝亦未能周到傳諭長麟等不可迴護前旨稍存拘

泥遷就之見朕辦理庶務毋必毋固惟期利民便商從不豫
存成見今據全德將前旨所詢數款查明覆奏所言甚是其
摺內稱若將建昌一府改食閩鹽恐撫州等府漸有私鹽閩
入於通省鹽務有關是以該處向係減價敵私合通省綱力
派出公費貼補與昨降諭旨相同果不出朕之所計從前酌
定行銷引鹽運道全藉關津山隘得以稽察遮攔若舍此久
定之界聽其就便行銷則平原地面毫無阻隔鄰鹽逐漸侵
入必至無所底止且以通綱之力資助建昌一府公費眾擎
易舉於該處商人並無賠累況有杉關等隘口可恃爲門戶
堵截閩私自應照孫士毅奏設立巡卡增派兵役嚴密稽查
以絕私販侵越之路至江西一省情形如此則他省可知看
來該督撫等酌議到時亦與全德所奏大略相同此事竟可

不必更張以恐仍其舊爲是長憐全德如未經出境均可不必前往如已前赴江西祇須將各隘口如何設卡巡緝可期永絕私販之處會同詳悉履勘覈定章程據實具奏毋庸再議劃歸閩省之事總之整飭確務全在各地方官實力緝私認真督察使各銷各地毋任鄰境鹽刃絲毫闖入則官引自必暢銷私販無利可圖並可不禁而自止也

乾隆五十七年三月丁酉

上諭內閣朕覽國史傅宏烈列傳載其生平忠烈事實深堪嘉獎傳宏烈任慶陽知府時卽豫知吳三桂蓄謀不軌首先計告及巡撫粵西正值吳三桂倡亂之時

聖祖仁皇帝授爲撫蠻滅寇大將軍傅宏烈親統官兵恢復梧滌等處屢奏捷功勞績懋著嗣又密疏尙之信種種逆謀請

削其藩封分其兵柄陳詞剴切備極忠誠後爲吳三桂逆黨
馬承廕所給劫往貴陽抗節不屈罵賊捐軀蒙

聖祖仁皇帝優卹賜謚並准祠祀桂林

世宗憲皇帝復敕入祀昭忠祠以褒忠藪朕披閱傳內所列事
蹟嘉其志節良用憫焉傅宏烈著再入祀賢良祠並令江西
巡撫查明傅宏烈後嗣有無官職現執何業據實具奏以副
朕篤念藪臣至意

乾隆五十七年四月乙丑

上諭內閣書麟等奏江西九江前幫漕船渡黃時陡遇暴風折
斷舵桿均各搶救無虞惟徐子信等四船衝入河心船身漂
淌所裝漕米盡俱沈失淹斃水手等六名又失一等二船
水湧入艙登時側溺沈溼米石現在搶獲等語江西九江前

幫漕船在黃河陡遇暴風人力難施以致漂失米石淹斃人口殊爲可憫所有旗丁徐子信傅勝樂徐全商陳玉軍船四隻漂沒米石席竹著加恩全行豁免船隻給料成造其淹斃水手人等照例優恤卽得生者亦屬可憫均著酌加賞賚至旗丁朱復一劉合二船所撈溼米著准其將食米易換同搶獲乾米分灑通幫赴通交納以示體恤

乾隆五十七年六月丁丑

上諭內閣據姚棻奏江西南豐廣昌二縣地居上游因閏四月下旬雨水過多溪河泛漲五月初三四日復大雨如注山水驟發以致被淹業經分別撫卹等語南豐廣昌二縣因雨水稍多致被淹浸雖經該撫查明業已照例撫卹並聲明水勢已退尙可補種晚禾不致成災但該處民居沖塌較多且有

淹斃人口之事朕心殊爲惻然此當速奏何遲至月餘昨熱河地方亦因山水陡發河隄一帶衝塌房屋業經降旨於和珅等奏請例賞之外加倍賞給所有南豐廣昌二縣應行賞給建蓋民房暨掩埋銀兩俱著照該撫所奏加倍賞給以示朕體卽災黎有加無已至意

乾隆五十七年八月壬申

上諭內閣據托倫奏雨水農田情形一摺內稱南昌新建進賢都昌鄱陽餘干德化湖口等縣濱河傍湖因江水漲發低窪田畝間有被淹現在積水未退恐雜糧不及趕種應查明分別辦理等語南昌新建等縣傍水低田被淹後積水不能速退以致雜糧不能趕種著托倫詳悉查明分別酌借籽種口糧統俟明歲秋收後免息還倉所有應徵糧銀並著緩至來

歲麥熟徵收俾傍湖貧民得資接濟該謾撫務須確切查勘
實心經理以副朕軫念民依至意

乾隆五十七年九月己酉

上諭軍機大臣等前據江西按察使歐陽永騎奏饒州贛州二
郡蓄有婦女之家多至老不能配偶者請以二十五歲爲限
不許逾期一摺當經部議准行矣女子二十而嫁著諸禮經
雖婢女屬在卑賤亦應及時配偶乃向來江西富家蓄婢因
自幼養成慣於指使遂致揩留服役逾期不得婚配實爲惡
習雖從前業經查禁但恐日久玩生積習未除著傳諭陳淮
留心訪察該省現在有無此等陋習卽查明嚴禁再江西向
有溺女之風最爲殘忍亦曾屢經飭禁並著該撫查明如尙
有此等相沿惡習卽據實查辦一併嚴行禁止俾士民家各

知凜遵母得仍蹈前轍以副朕惇化施仁至意

乾隆五十八年三月乙巳

上諭內閣陳淮奏江西九後等幫船六隻湖南省幫船二隻在鄱陽湖及湖口縣江面猝遇暴風船米漂沒并淹斃人口現在查明分別辦理等語江西湖南省幫船在湖在江陡遇風暴人力難施以致漂失船米淹斃人口殊爲可憫所有江西幫旗丁項受七鄖大興邱雲昌周均保劉祥葉伏一軍船六隻湖南幫船旗丁盧添隆周伏三軍船二隻共船八隻漂沒米石席竹等項著加恩全行豁免船隻給料成造其淹斃水手人等照例優恤其各船撈獲溼米准其將食米易換同搶獲乾米分灑通幫赴通交納以示體恤

乾隆五十八年八月辛巳

上諭內閣陳淮奏勘明南昌七州縣濱江沿湖被淹窪地水勢
消退遲緩晚禾雜糧俱不及補種等語此七州縣上年窪地
被淹曾經降旨賞借緩徵本年又復被淹秋禾雜糧補種不
及民力未免拮据其豐城等五縣被水農民亦未免稍形支
紓著將南昌新建進賢鄱陽餘干德化湖口等七縣賞借兩
月口糧其豐城德安彭澤建昌瑞昌五縣著借給一月口糧
仍俟種麥時該撫再行酌量借給籽種至南昌等七縣所有
本年應完上年借領籽種口糧著緩至來年秋熟後徵收其
本年借領口糧籽種著遞緩至乙卯丙辰兩年免息徵還又
本年所有各縣被淹民屯窪地應徵地丁屯糧蘆課等項計
銀數自三千餘兩及三四百兩不等著一併緩至來歲麥收
後起徵該撫務須督率州縣實力經理俾小民均霑實惠毋

任胥吏稍有侵冒等弊以副朕軫念黎元有加無已至意

乾隆五十八年九月庚申

上諭內閣據陳淮奏查明被水各縣內南昌等七縣尙有應徵正副漕米其高阜地畝現在照舊輸納惟低窪被水各戶秋成失望輸納維艱等語江西南昌等處被淹村莊雖止各縣中之一隅但該處糧戶旣已失收且多係連年被水之區若復令其買米完糧民力未免竭蹕所有南昌新建豐城進賢鄱陽餘干建昌七縣應徵本年漕米著加恩緩至來歲秋成帶徵交倉俾民力益資寬裕以副朕軫恤加惠至意

江西通志

卷首之三

訓典

嘉慶三年五月壬辰

上諭內閣富綱奏此次江西漕米截留四十萬石分貯東省所有餘米請令各丁就近糴賣等語江西漕米旣經截留東省各丁交贖餘米自應准其就地變糴仰該丁等得沾餘潤而東省得有此項餘米糴賣民食益臻充裕

嘉慶四年五月辛未

上諭內閣蔣兆奎奏江西袁州幫旗丁易梁李鄧賓和潘王二漕船三隻行至黃河中溜遭風沈溺漂失米三千三百十二石淹斃水手三名等語易梁李等漕船渡黃猝遇風暴人力

難施並非搶救不力所有漂失米石著加恩全行豁免其淹斃水手等並著照例恤賞因思重運漕船北上雖應迅速趨行然催趨過急卽遇風狂浪急之時亦皆冒險開行殊非慎重之道本年江南幫船到通屢據戶部奏報較上年早到四十日至三十日不等可見重運船隻趨行俱未免過速似此每年因有比較總早數十日則將何所底止且旗丁等各有利帶貨物沿途原准售賣若晝夜趨行竟無消貨之暇於旗丁生計亦有關礙嗣後各幫漕船固不可任其脫幫停泊而遇有險要河道務須察看風色行走與其因欲速致有漂失之患何如略爲停待以昭慎重所有渡黃及到通日期祇須較例限早數日交糧回次已無誤冬兌冬開之限不必過爲催趨也

嘉慶四年七月丙子

上諭內閣上年江西甯州辦理邪匪一案朕卽聞署南昌府知府蔡齊明最爲出力昨蔡齊明因俸滿來京引見請訓時經朕詢問辦理此案原委並面詢該員因何未經巡撫保奏據稱事竣後巡撫原欲保舉該員以地方官不能防範於先致邪匪滋事實不敢藉此邀功向巡撫稟阻嗣經奉旨甄敘在事出力人員該員已列超等咨部議敘等語地方匪徒滋事該管官員不能先事豫防本有失察之咎但能辦理妥協迅速完竣而復不留遺孽卽屬伊等之功甯州一案固由張誠基經理得宜迅就撲滅但蔡齊明一經得信卽馳赴該處帶領鄉勇殲戮匪徒臨事旣妥爲布置事後復加意搜查實爲奮勉出力且蔡齊明究係署任知府所屬甯州距省較遠而

該員以未能覺察於前深自引咎不敢邀功歸美巡撫尤得退讓之風彼躁進冒功者豈不聞而滋愧卽此一節更屬可嘉蔡齊明除業經予敘外著加恩賞給道員職銜用示獎勵

嘉慶五年二月甲辰

上諭軍機大臣等御史鄭宗彝奏請飭查鹽務岸費一摺湖廣江西運鹽口岸向有匣費自經裁革後商人成本減輕於辦運寶多裨益乃日久懈弛其弊復生竟至有每引用至一兩數錢以上之事其運鹽江船復不遵奉官價任意高昂而自場竈至各口岸無益之費有增無減似此種種糜費商本日虧於國課民生所關匪細著傳諭姜晟張誠基書魯嚴飭各省者亦應令該商等酌定數目費歸實用毋許絲毫浮冒儻

此後裁革各款仍屬有名無實惟該督撫鹽政是問

嘉慶六年三月己亥

上諭內閣江西甯州地方於嘉慶三年秋間有逆匪劉聯登等滋事卽時撲滅一案朕聞彼時官兵未到之前該州士民各自保護村莊同心抵禦以故賊匪不致蔓延立就擒獲該撫雖經量加獎賞並未奏明辦理曾諭令張誠基查明在事出力者據實具奏候朕加恩茲據奏民人李君弼等五名或鎗斃首逆或拏獲賊首武生梁韜等十名或把守緊要隘口或協同官兵殲賊均係最爲出力之人開單進呈民人李君弼著賞給把總職銜溫逢堯徐植三陳秀鳳詹茂林俱著賞給外委職銜仍詢明如願入伍卽令其隨營差操遇缺補用武生梁韜著賞給把總頂帶監生梁岐周泮張映璧著賞給從

九品頂帶民人周海澄周安國張茂堂吳鼎寶吳豫源陳文選俱著賞給外委頂帶以示獎勵該州士民等敵愾同仇知方向義州治保護無虞著將甯州改爲義甯州俾該處紳民顧名思義益勉敦龐用副朕嘉惠善良至意

嘉慶六年五月丁丑

上諭軍機大臣等張誠基奏查明通省倉庫實數咨部分別追補一摺所奏大謬無此辦法各省錢糧倉庫原應存貯充實不得絲毫短少設稍有虧缺該督撫本當據實叅辦至於彌補二字原不可直達朕前豈可公然咨部辦理近年因直隸係畿輔近地差務殷繁各州縣輾轉挪墊以致倉庫虧短事非一時官非一任特降旨將虧空各員姑免治罪分別虧項多寡予限著追此乃格外恩施曾明降諭旨他省不得援以

爲例今張誠基竟欲倣照此案咨部辦理巧爲嘗試試思江西地方安靜年歲屢豐並未有需費浩繁之處何以自乾隆四十一年至嘉慶四年各州縣虧空銀數至八十三萬餘兩之多張誠基身任江西巡撫已閱多年盤查倉庫無虧俱有奏案可據今乃虧短如許之多安知非該撫任內各州縣任意虧缺歸咎前人作爲歷任虧項思以罰不及眾爲屬員開脫而摺內尙云不敢以咨部爲自占地步之計其誰欺乎張誠基著傳旨嚴行申飭各省虧空朕所以不卽嚴辦者原以各該督撫自顧考成明知所屬倉庫短缺斷無不上緊籌辦之理果能不動聲色全數補完何必因此輒興大獄乃各督撫等竟似一經奏明卽有恃無恐置身事外上年荆道乾岳起皆曾以倉庫虧短咨部經部臣具奏當經降旨嚴飭張誠

基豈未之聞乎今竟敢一面奏聞一面容部豈以如此辦理
伊卽能倖免罪戾耶該撫如果欲明辨虧空應卽徹底清查
將因何虧短從前何以不行叅奏緣由和盤托出據實陳奏
朕不難將該省大小官吏一併嚴辦以儆其餘惟該撫自行
酌量耳儻或藉彌補爲名侵害閭閻擾累地方致生事端亦
必先將該撫治罪再將不肖地方官一體嚴辦勿謂誥誠之
不早也凜之慎之張誠基原摺著擲還其咨部之案亦著部
臣速行駁回

嘉慶七年正月己卯

上諭內閣朕聞上年江西正考官周興岱前赴該省以侍直內
廷炫耀高興口稱有奉旨查訪地方之事並擅出告示收受
程儀等情恐未盡確實當卽親書硃諭密令張誠基秉公詳

查並諭此事若虛卽差人覆奏如果屬實卽由三百里奏聞
儻張誠基查明實無其事尙當明降諭旨爲之湔雪乃張誠
基由驛奏到之摺與朕所聞無異當將原摺批交周興岱明
白回奏茲據伊奏稱與江西地方官接見時並未提及查訪
地方事務惟素聞該省房官多有舞弊是以於入闈前出示
嚴防閱卷時有呈薦草率者面加駁斥至巡撫司道及房考
官向例致送程儀曾再四堅卻始行收受等語朕簡派各省
考官專爲掄才大典原不干與外事卽周興岱係內廷行走
伊陞辭時亦並未令其兼查地方事件今伊回奏摺內於此
一節雖不敢自行承認而其擅發告示收受程儀衣服業已
屬實各省主考專司衡校防弊係監臨責任今周興岱擅出
告示卽係有心炫耀況該省致送正考官贐儀較副考官增

倍非周興岱以供奉內廷在外誇張何以該省官員畏其聲勢餽送從厚耶周興岱係戶部侍郎兼管錢局二品大員得項優厚非如翰林部曹等官職分較小者可比奉命典試自應潔已奉公保全顏面乃於該省官員餽送銀兩輒行收受並告以未帶冬衣致撫藩等添送衣裘殊屬卑鄙豈可復玷內廷清秩周興岱著退出南書房仍交部嚴加議處至外省地方大吏節經降旨嚴禁餽送今張誠基等不但仍沿陋習致送主考程儀並因周興岱係屬內廷增多見好且據張誠基摺稱該省彌補虧缺將從前浪費省出歸公似此濫行餽送非浮費而何況周興岱卽向人炫耀亦不過詞氣之間偶有流露何致通省相率趨承甚至周興岱口稱未帶皮衣卽行餽贈可見張誠基等平日辦事必非無瑕可指慮其舉發

故爾曲意周旋仍蹈逢迎積習張誠基邵洪衡齡俱著交部
議處向來正副考官奉差出京無論官階大小各按省分遠
近賞給盤費並准馳驛前往行走已屬從容其職分較小之
翰林部曹等官出關後督撫兩司養廉優厚或致送土儀稍
助路費尙屬地主之誼至房考各官俱係州縣祿入無多若
破產餽送主考必致賣舉子通關節而主考受房官之餽送
何能秉公閱卷嗣後不得私自餽遺考官亦不得輒行收納
若考官係三品以上大員卽督撫兩司亦不准致送路費儻
經此次訓諭之後仍有私行餽遺收受者一經查出卽嚴行
懲辦將此通諭知之

嘉慶七年九月丙子

上諭內閣張誠基奏江西新城縣地方七月十五日大雨如注

西南鄉會仙峯等處山水陡發水高丈餘河道宣洩不及奔湧入城以致西南鄉一帶淹斃人口多名衝壞村莊田畝城內衙署倉廩亦多有坍塌漂浸等語該縣山水驟發人民逃避不及以致淹斃多名並衝壞田地房屋殊堪憫念該縣先經被旱業已加恩將通縣錢糧緩徵現在又被水災民情更爲拮据著再加恩將該縣被水田地一百二十三頃四十九畝本年未完錢糧概行豁免仍著該撫查明現在失業貧民加意撫恤於應給修復田畝房間銀兩務督同印委各員按名親放俾民霑實惠毋致失所其衝塌衙署倉廩並著查明照例動項興修漂失穀石免其賠補

嘉慶七年九月己丑

上諭內閣給事中魯蘭枝奏謹陳籌荒一得一摺本年江西省

聞被水旱收成歉薄業經加恩緩徵給賑並撥兩淮鹽義倉
穀十萬石運往平羅以資接濟但此次被荒之地較廣自須
商販米運流通更於民食有裨惟該給事中所稱該省士民
有願赴川買米者請官給路票一箇此不可行地方殷實之
戶誼切桑梓運買濟羅自應各從其便若令赴官領票轉多
一番擾累至沿途退抑例禁綦嚴著飭諭經過各關口遇有
運米船隻過境祇須驗明並無夾帶私貨立卽放行不得勒
索分文並該督撫嚴禁沿途刁民勿許強留阻奪庶商販閩
風踵至市價不至增高民食自無匱乏其有樂善捐施及減
價平糶者地方官自可報明上司量予獎勵但不必官爲經
理致啟胥吏勒索之弊該部遵諭速行

嘉慶八年閏二月丙子

上

諭內閣奏承恩奏江西南昌瑞州等屬糧價過昂請旨大加減糶等語南昌瑞州各屬地方上年偶值偏災收成歉薄節經加恩賑恤並諭令減價平糶茲據奏糧價較之常年增長過倍若僅照例減糶則祇一錢卽至減亦不過三錢恐市價不能一時驟平自應大爲調劑以濟民食著將南昌瑞州等屬糧價在二兩四五錢者每石減銀二錢價在二兩六錢至二兩八錢者每石減銀三錢價在二兩九錢至三兩一錢者每石減銀四錢價在三兩二錢至三兩四錢者每石減銀五錢統俟市價平復再行停止該撫卽督率地方官認真經理務期於小民生計實有裨益毋任胥吏市儈從中滋弊以副朕惠愛黎元至意

嘉慶九年四月甲戌

上諭軍機大臣等奏承恩奏續獲逆匪密擬具奏一摺覽奏俱悉此案素習老母教之王添組卽王瑞忠捏稱彌勒佛轉世煽惑鄉愚上年廖幹周起事之時懇其幫助許爲上清宮教主該犯輒自稱瑞忠法中皇寫入旗內號召眾人實爲罪大惡極若日久潛逃必致養癰貽患奏承恩於訊出之後能不動聲色設法鉤致密將該犯及助惡之曾啟三周仲祥王添保一併拏獲搜出旗式底稟究訊得實將該犯等分別首從問擬凌遲斬決卽請王命正法傳首示眾俾地方匪徒知有儆戒所辦甚好其各教內安靜守法未經滋事之人奏承恩並不紛紛查拏免致驚擾所見亦是該撫仍當出示曉諭以王添組係教內爲首之犯伊自稱彌勒佛轉世能知過去未來人有災難皆可藉伊解救今伊已經地方官拏獲正法是

該犯本身卽不能自免災難又何能解救人之災難乎可見邪說斷不可聽徒自罹法網耳爾等鄉愚無知受其哄騙紛紛斂錢施捨隨同入教今亦不加深究但爾見該首犯如此被拏伏法亦當共知猛省悔悟前非從此安靜家居勿再從教滋事庶可免罹重罪儻尙執迷不悟廣招醜類播造謠言則憲章具在不能稍爲曲貸如此詳明曉諭示以利害民人等自必畏懼警省勉爲善良

嘉慶九年九月壬寅

上諭內閣奏盤獲吳錦榮一犯係江西豐城縣人從前在湖北竹山縣貿易被賊匪裹脅面刺白蓮教三字旋卽逃出該犯不念家有母妻在外游蕩數年之久始回籍恐另有別情奏承恩已飛咨吳熊光俟查無別樣情節卽將該犯

遞解原籍起除刺字照不應重律折責三十板交給親屬保
甲嚴加管束等語所辦甚是從前賊匪裏有良民面刺蓮花
及白蓮教三字原係賊匪詭計使之別於良民絕其歸志迫
以不得不從經朕俯察其情屢次降旨以賊匪中如劉之協
王廷詔等皆眞係白蓮教匪從未聞顯有別識其面刺蓮花
及白蓮教者必非入教之人臨陣時不得濫行誅戮俾良民
自新有路今自大功告竣以後從前自賊中逃出者紛紛回
籍每有身列齊民而面刺字樣仍未消除若不明示以革面
洗心之道誠恐同居里黨見其面有刺文目爲匪夥不齒同
類有意欺凌兼恐該犯因有面刺字樣轉藉以惑眾驚愚別
滋事故俱不可不防其漸現在江西既有拏獲之犯則他省
似此者自復不少著該督撫轉飭地方官出示廣爲曉諭如

有從前被賊刺面未經銷毀之人卽令自行起除勉爲貢書
儻經此次曉諭之後有甘受賊玷不行毀除者一經查出卽
照吳錦榮之例治其不銷毀之罪嚴責示懲此乃朕愛護良
民欲湔除眚慝之至意著將此通諭知之

嘉慶十二年六月丙戌

上諭內閣金光悌等奏查明萬載土棚兩籍實在情形請將該
縣童生照例停其考試一摺據稱學政汪廷珍按試屆期該
府縣稟稱該縣童生尙未赴縣投考細加查訪仍係孫馨祖
等從中阻止以致該處童生觀望不前等語萬載縣土棚兩
籍童生考試屢經涉訟前任學政曹振鏞於上年歲試之時
曾以該生童等情願合考具奏當經降旨令其仍舊合試按
額取進不必再行查辦俟將孫馨祖等拘解到日照例辦理

茲該撫等訪聞該邑童生自合考取進之後該處士民仍不輸服而孫馨祖一犯日久未獲該署縣周吉士並不實力緝拏以致孫馨祖仍復倡率滋事於學政按試之日膽敢阻撓該縣童生竟不赴縣投考是孫馨祖尚在近處藏匿並未遠颺殊屬目無法紀不可不嚴加懲辦以儆刀風所有孫馨祖一犯著該撫遴委幹員上緊緝獲究明阻考確情按律定擬再將該縣土棚兩籍考試章程會同該學政妥議具奏前署萬載縣事試用知縣周吉士並著革職

嘉慶十九年閏二月丙寅

上諭軍機大臣等御史黃中傑奏稱江西吉安贛州南安三府地方多有强悍不法之徒偶因細故卽聚眾械鬪並聞贛州之信豐縣小園王姓兇頑尤甚動輒糾眾千人持械入城毫

無忌憚地方官體于處分容忍不辦每以告病乞歸等語頑
民糾眾械鬪實爲囂凌惡習日久必致釀成巨案該管地
官畏葸因循匿不查辦且以離任爲自全之計是以官而畏
民尙復成何事體該御史籍隸江西見聞自確著先福卽嚴
飭該三府官員認真查禁實力整頓其信豐縣小園王姓旣
確有住址姓氏著卽查明遴委幹員緝拏究辦該撫不可存
畏難之見若顛預寬縱養癰貽患必將該撫從重治罪不稍
寬貸

嘉慶十九年十月戊寅

上諭江西巡撫阮元奏拏獲逆案主謀夥要各犯先行審明辦
理一摺此逆案匪胡秉耀買得殘書一本內有陣圖及悖逆
俚語卽向逆夥邱添澤楊易盧勝輝誇稱解得書內陣圖如

得有爲首起事之人便可圖取富貴楊易隨以朱毛俚可以
假託前明後裔朱毛俚聞邀自任不疑遂共赴積善禪林同
謀爲逆取逆書內俚詞稱爲後明晏朝年號僞封胡秉耀等
官職輾轉糾約入夥給與僞札該逆等踐土食毛膽敢性同
梟獍自外生成實屬罪大惡極阮元到任未久卽能飭屬於
各地方編查保甲嚴密遂將鉅案立時發覺辦理迅速實屬
可嘉阮元著賞加太子少保銜並賞戴花翎卽發去花翎一
枝白玉翎管一個並賞給大荷包一對小荷包四個各省承
平日久奸慝潛生全在地方大吏飭屬認真查察除莠卽所
以安良上年林清一案其倡爲謀逆已經數歲如直隸總督
順天府尹等於該逆等未經舉事之先早能如此次之訪聞
捕獲人數不多豈不甚易乃經歷年所如聾如噴及至釀成

臣逆毗連三省羅於刑誅兵革者爲禍甚烈實皆該大吏等
因循怠玩貽誤所致各該督撫具有天良能不引以爲鑒耶
案內胡秉耀等十七名業經分別凌遲斬決辦理惟程麟祥
等三十五犯定擬發遣爲奴尙屬輕縱著改爲絞監候入於
明年秋審情實該撫卽將各犯分交各府監禁不准與外人
交接通信如稍不安靜卽行正法至朱毛俚一犯尤爲此案
罪魁必應卽時拏獲處以極刑以快人心而伸國法著兩江
湖廣閩浙各總督江西福建浙江江蘇安徽湖北湖南各巡
撫一體飭屬查拏如於何省拏獲卽由該督撫訊取供詞由
四百里具奏一面卽於該省正法各該督撫皆當視朱毛俚
一犯在伊境內藏匿飭屬認真嚴密訪拏務在必獲不得以
現在已飭鄰省查拏彼此特有委卽稍爲鬆勁如阮元能於

江西境內拏獲仍當給與議敘其餘曾化龍等十九犯拏獲後如訊係倡謀推奉朱毛俚爲首之犯卽凌遲處死如得受僞封官職並糾約人眾者卽斬立決倘明知叛情聽從得受憑票並未受職糾人者擬絞監候入於明年秋審情實將此通諭知之

嘉慶二十五年四月乙未

上諭內閣朕恭閱

皇考高宗純皇帝實錄內載乾隆二十年正月欽奉

諭旨昨於幾暇恭讀

皇考世宗憲皇帝上諭有江西撫臣謝旻以原任學道高鑽崇祀名宦降

旨訓飭並詢問江西通省紳士應否崇祀令其據實陳奏因憶

近時大臣中曾有祖父得祀鄉賢者卽尙書王安國左都御史楊錫紱之父其同時題請部駁者曰徐景京則其子固非身列顯要者也可見該撫之所請原在可駁可准之列而部臣之所議卽寓高下其手之心嗣後子孫現任九卿者其祖父概不得題請入祀其身後鄉評允當者聽著爲令等因欽此仰見我

皇祖

皇考於崇祀名宦鄉賢一事加意慎重以勵名教而肅典章前年直省曾將萬承風錢樾二人題請入祀鄉賢朕以伊二人不過循分供職並無傑出謀猷當經飭令禮部分別准駁覆實辦理景仰

前謨若合符節誠以崇德尚賢原以風勵眾庶必其人無忝公

論方能矜式里間有光俎豆其事殊有關繫嗣後各直省凡
題請入祀名宦鄉賢者該督撫務當確切查覈不得以名實
不符者濫竽陳奏部臣尤應秉公覈議不可稍涉瞻徇庶揚
清激濁公議昭然其有裨於世道人心者非淺也將此再通
諭知之

嘉慶二十五年四月丁酉

上諭內閣錢臻奏鄰省行銷鹽引請釐定額數以免侵越影射
一摺江西鹽務疊經整頓官引漸見暢銷而私煎私運仍未
能盡絕據該撫奏稱粵鹽浙鹽私煎私運侵入該省之弊總
因粵鹽於正額之外又有融銷借銷代銷搭銷等項名目浙
鹽亦有溢銷餘引名目江省不知應銷定額無憑稽察以致
奸商私販串通影射易滋透越嗣後著兩廣總督浙江鹽政

各將該省行銷江西引鹽數目及粵省應設子店官鍋詳悉
覈定額數知照江西省該省卽按額稽查俾得實力緝私以肅
鹹政

嘉慶二十五年十月戊戌

上諭軍機大臣等御史楊騰達奏伊籍隸江西新城該處自夏
至秋久遭酷旱早稻收成不及三分晚稻收成不及二分爲
數十年未經之災毗連新城地方大率如是以江西省所屬
而言自南安府以下各屬一帶多有旱災情形其地甚廣等
語地方水旱之災關乎民瘼甚鉅江西省本年夏閒被旱前
據瑞弼奏七月分雨水農田情形摺內稱七月中旬通省得
雨透足惟南昌等六府所屬豐城奉新等二十二縣因得雨
已遲中晚兩稻有已發黃萎及未克栽插之處止可補種雜

糧現飭分委委員履勘此外各府州屬俱可稔收等語今該
御史所奏旱災之新城一縣及毗連新城之建昌府屬各縣
均不在該撫所查二十二縣之內恐前奏尚有不實著該撫
卽速查明各州縣被旱情形據實具奏並一面勘明災分奏
請分別施恩不可稍有諱飾

嘉慶二十五年十一月丁卯

上諭軍機大臣等本年六月二十七日御史魯垂紳請查辦江
西銷鹽分數劾叅鹽道胡稷因循廢弛一摺當經

皇考仁宗睿皇帝降旨交孫玉庭延豐查辦嗣於七月二十八
日孫玉庭等奏已達員馳往江西會同署鹽道許理城詳查
尙未據查明具奏茲又據叅奏胡稷回任後勢必將捏報暢
銷之處設法彌縫又於已革都司徐富國稟報鹽店送給規

費一案輒轉袒護隱瞞並縱容管門家丁金三盤踞署外興
書吏串通舞弊等語著交孫玉庭瑞弼延豐會同嚴查該鹽
道胡稷所報暢銷引課是否相符有無藉官運私情弊並將
徐富國所稟收受規費及袒護鹽店縱容家人各情節逐一
徹底根究據實叅奏不可稍涉瞻徇

道光元年七月丙子

上諭軍機大臣等據御史朱爲弼奏江西浙江福建連界之封
禁山從前永行封禁乾隆年間趙殿最陳宏謀兩次請開經
三省勘明旋寢其事近有無藉之徒盤踞山內伐木作炭建
蓋棚座墾種地畝每年雖有總兵巡查之例止於山外巡歷
一徧咨報兵部實屬具文請令三省督撫會籌設法驅逐等
語封禁山界連閩浙江西三省國初勦平土寇後永行封禁

自應嚴密巡查不准奸民藏匿今如該御史所奏無藉之徒私入山中伐木蓋棚墾地是徒有封禁之名實爲藏奸之藪且恐有要犯巨姦竄匿其中尤當嚴密稽查著各該督撫會籌妥議密查禁山之內是否果有流民在內潛匿居住人數約有若干如人數無多或派妥員前往曉諭驅逐若人數過眾則當妥籌良法相機辦理不可操之過急激成事端亦不可因循諱飾但爲目前苟安之計更不計及久遠以致貽患將來也

道光二年二月辛卯

上諭內閣慶保等奏覆勘封禁山情形籌議辦理一摺江西浙江福建連界之封禁山路徑情形前經降旨交慶保等委員會同江西委員前往確勘茲據奏稱封禁山之正面門戶及

緊要隘口悉在江西之上饒廣豐境內其山背雖界連閩省
俱係峭壁中隔深澗並無路徑可通其江閩交界之處久已
設關防堵流民不致潛入惟閩省原設五汛崇安所屬之山
坳塘一汛與禁山內口之範家坳汛相近從前本有小路雖
久經被水衝塌究屬要地自應設法防範著照所請於該汛
原設兵二名之外再添汛兵三名其浦城所屬之張村地方
再添設張村汛設兵五名責成浦城汛弁查察其文武會哨
之期向由該二省總兵會巡一次著閩省再派該管知縣按
月分巡一次道府按月會巡一次均令親往周厯查察其江
西上饒廣豐境內禁山現經慶保等委員會同江西委員進
山覆勘著勘明卽據實覆奏

道光二年閏三月丁亥

上諭內閣毓岱奏查明契稅情形並籌議杜弊章程一摺江西
州縣虧缺雜稅前經降旨令該撫詳查並妥議章程具奏茲
據奏稱該省契稅尙不致隱漏侵吞而拖欠稅銀實所不免
自應覈實辦理著照所請嗣該省各廳應用契尾除贛州南
安甯都三府州距省較遠仍照舊每年彙領外其餘各廳州
縣均改爲每季請領一次查照歷年每季需用若干照數酌
給將用過契尾徵收稅銀按月報司並將截存尾報按季造
冊查覈其稅銀收足五百兩卽行解司如每季徵不足數亦
卽儘數報解儻用契不及十分之八及稅銀未經解兌不准
續領其投稅業戶較多未及一季用契已過十分之八及稅
銀全完仍准赴司續領如有徵多報少及任意延欠者立卽
嚴叅撤任至厯年舊欠銀兩趕緊勒限嚴提並將延玩不解

各員分別叅撤以杜侵欺而儆疲玩

道光二年十一月壬辰

上諭軍機大臣等御史程裔采奏江西質穀章程實不便民一
摺此案前據毓岱奏議章程請旨復經辛從益以穀押係民
閒量力舉行不須官爲經理奏請無庸籌議朕節次諭令確
切訪查據實具奏總期有益於民貧富兩便方爲至善嗣鄧
廷楨奏貧富並無妨礙請仍照前議辦理業已依議准行茲
據該御史復以息穀過多限期太迫實有窒礙難行之處據
稱民間穀押其息不過一分五釐至二分而止今每石官定
納息三斗徒爲富戶繼長增高未嘗爲貧民衰多益寡秋後
取贖穀經風颶折耗息再加增是蓋藏盡歸盤剝至以物質
穀價值較穀多至數倍向來三年不贖則沒入其本今官限

一年是衣物未得半價甫及一年遂已盡沒市塵典鋪例准
三年取贖何獨質穀勒限一年其以穀典押銀錢之議尤不
便民等語民間典質稱貸有無相通事所常有江西省所屬
向有殷實之戶於青黃不接之時將餘穀聽農民質押以有
餘補不足沿行日久貧富相安若再另立禁令官爲限制事
涉煩苛致滋流弊朕前此厯經諭令該撫等隨時體察實在
情形酌量辦理現在旣據該御史指陳諸弊於貧民毫無裨
益自不如聽其自便無庸官爲經理著阿霖於接奉諭旨後
遵照妥辦務期窮黎賙恤有資無許官吏藉端滋擾

道光三年四月乙丑

上諭內閣魏元煜等奏江西各幫兌漕縣倉請援照蘇松幫船
例挨次遞推一摺江西省兌運漕倉百餘年來議拈議派屢

次更張並無一定辦法未免日久滋弊茲據該漕督等查明
實在情形奏懇酌量變通以期經久著照所請除饒州撫州
兩幫便兌饒州府等屬漕糧都昌縣輪派尾幫兌運卽令截
留滄州兵米均著仍循舊章辦理外其餘十一幫領兌四十
餘廳縣漕倉著准其按照蘇松新定章程交該漕督等卽飭
該司道各屬漕倉秉公配搭分作十一籤傳齊幫弁旗丁眼
同掣定縣倉自道光三年新運起三年一屆不必再掣由後
推前挨次輪轉如船多米少以後倉米撥補米多船少以後
幫船數找兌至遇災緩搭運之年分別確查酌籌妥辦毋任
丁吏等再有勾串鑽營以祛積弊而順幫情

道光三年九月壬辰

上諭內閣程含章奏知縣查勘水災遲延一摺江西萬年縣隔

塘等村田畝於七月閒因雨被淹不能補種該署縣張家栻並不立時查勘稟報直至被水民人赴府具報經該府焦景新札飭始與委員會勘其被水田畝若干仍無實在數目實屬玩視民瘼前署萬年縣試用知縣張家栻著交部嚴加議處前署饒州府候補知府朱浩先經接據民人具報水災並不卽時往勘僅移交後任亦屬辦理遲延著交部議處所有萬年縣被水田畝通計不及一隅中之一隅惟農民虛費工本秋收無望各業戶應完本年錢漕著加恩准與德安等縣勘未成災田畝一體緩徵以紓民力著該撫卽飭該道府督同查勘明確將被水頃畝歸案具題

道光四年八月壬戌

上諭內閣孫玉庭等奏會議江西鹽務杜弊緝私章程一摺江

西鹽務鄰私最易侵越惟粵私爲尤甚粵鹽引地多在江西上游近年粵鹽滯銷專藉江西之南安贛州信豐會昌興國等埠爲該省暢銷之地直至萬安縣方爲淮引地界該縣芙蓉門江面兩岸設卡堵緝每多懈弛著阮元嚴飭該省運司遵辦各銷各引並將粵省商運額數清釐知照江西稽查以別官私卽因粵省綱滯不能不有融銷亦酌量引地可融若干明定限制以清來源再於芙蓉門兩岸飭鹽道親往查勘移會南贛鎮選派叅遊大員添帶弁兵並增設巡船扼要堵緝遇有大夥私梟准放鳥槍格殺勿論非大夥拒捕不得擅放仍將現在解巡各員及地方官指叅分別嚴加議處毋稍瞻徇至商鋪擡價病民亦宜查禁著將官鹽例價按照銀錢市價每斤應折定若干隨時頒示曉諭以杜弊混至糧船夾

帶大千例禁嗣後除經過江南江西按段專派摺查如不服盤查將丁舵治罪押運各員叅處外並著天津鎮道每屆回空查禁固販毋許偷運再於經過關津查貨之便順查有無夾帶私鹽一經查出卽飭入官嚴拏帶私之人治罪餘免深究催趨開行其餘商民船隻並著各關監督諭令查稅人等並查有無夾帶私鹽除途中食鹽不計外如十包以上至五十包者卽將多出包數入官充賞船仍放行儻在五十包以上鹽包入官究明起意私帶之人按律詳辦船仍放行免究

道光四年十月甲申

上諭內閣嵩溥奏查辦各屬倉穀一摺江西省各屬額貯常平倉穀除報部之清查等案未買缺穀外共應實存穀一百二十萬一百九十八石零該護撫飭屬查明南昌等十二府州

所屬各廳州縣缺穀自數百石至一萬餘石不等共計二十四萬石有零其致缺之由或出借籽種民欠未完或歷任交代盤折徵變作價流交歷久相沿官非一任現在缺數幾及額貯十分之二若不徹底清查及早歸補必致折耗久而愈多且啟掩飾虧挪之弊該護撫奏稱乘本年收成豐稔嚴勒期限趕緊採買所辦是著交新任巡撫成格卽飭各府督率該州縣將歷任缺穀乘時採買報盤其由原交價銀係民欠錢漕作抵者卽同民欠籽種一律嚴限催徵買補自本年十月爲始缺穀一萬石以上者勒限三年五千石以上者勒限二年一千石以上至數百石者勒限一年埽數買補完足該州縣果能依限買完其從前徇隱折價之咎尙可寬免如再逾限不能買補足數卽著一併叅辦自此次查辦之後儻再

有續缺倉穀卽以侵虧例從重治罪接任之員徇隱收受者一體究叅以挽積習而重倉儲其現在飭查尙未詳覆之廣信饒州二府並著嚴催覈實查辦

道光五年八月甲子

上諭軍機大臣等昨有旨令各省有漕督撫漕糧仍照例徵收本色毋得藉口折漕致滋作弊本日復據成格奏江西額漕覈計七十萬有奇距河距海均千餘里而遙且地極卑溼若仍徵本色恐來年停運存貯易致徽變請全數改徵穀石如明春照常濟運卽飛飭各州縣趕緊確張上兌如仍有阻滯責成州縣變價銀錢並解其穀石不及變價者妥爲存貯以待下次確碾搭運等語漕糧徵收米石由來已久今欲計米徵穀恐不肖官吏以改折爲名藉端浮收勢所不免若謂該

省卑溼米石不能存貯試思京通各倉分貯漕米陳陳相因
積至數年之久尙不至遽行徵變且徵收穀石屆時始令動
碾勢必緩不濟急再州縣多此一番碾碾夫工飯食又將藉
口賠累至所稱銀錢並納必至抑勒紛擾所奏著毋庸議該
撫仍遵前旨照例徵收本色隨時咨查江南湖河情形如明
春照常濟運卽全數開兌敢行儻稍有阻滯仍著妥爲存貯
以俟下年搭運或米石不堪久貯再行籌議變價解歸司庫
聽候動撥不得輕率改易舊章致滋流弊江西省收漕較早
該撫現已調任廣東巡撫如妾奉諭旨業已起程卽移咨謹
理巡撫嵩溥遵照辦理可也

道光六年七月丙午

上諭軍機大臣等御史熊遇泰奏會匪擾害地方請旨飭查一

摺據稱江西贛南一帶近有匪徒燒香結盟每人帶刀一把
名爲添刀會又名千刀會聚黨至數百人出沒無常沿途劫
掠上年冬閒興國雩都瑞金地界一月之內疊劫商販至五
十餘起又有泰和縣馬家洲郭姓被劫資財萬餘金迄今未
獲破案並聞會匪與鹽梟勾結如泰和之馬家洲萬安之白
渡市私梟充斥每借刀會爲聲援放礮闖關破江而下又有
匪徒創立花會製爲三十六字號三十六天罡令人射取打
中者數十倍償之此風興國雩都吉水泰和永豐等處爲尤
甚每日開廠嘯聚至數百人其中多有流入刀會者非尋常
賭局可比等語匪徒創立會名久干嚴禁如該御史所稱會
匪聚黨劫掠頻仍甚至鹽梟借刀會爲聲援肆行無忌地方
文武各員所司何事至花會聚眾賭博亦應嚴加查禁免滋

事端著韓文綺督同臬司邱樹棠將該御史所奏前項各情逐加訪察飭屬認真查拏毋稍疏縱至該御史所稱鄉村邊閭地方官耳目難周請就各鄉中選擇公正才幹之鄉耆舉爲鄉約一有覺察立即送官究辦如有隱瞞卽治以徇庇之罪並於衝要地面移駐一二文武員弁專司緝捕藉資彈壓其法是否可行並著體察地方情形據實具奏

道光七年二月癸亥

上諭內閣韓文綺奏運丁借款懇請分別起限扣還一摺江西各幫漕船道光五年在通庫天津道庫借欠銀兩奏准於司庫地丁項下借墊分作五年二年扣解歸款本年應扣初限銀一萬七千三百餘兩又在江南總局借領銀兩分作六年扣清本年應扣二限銀三千七百五十二兩零上年又借天

津道庫廠費銀四萬二百九十一兩零通庫酌借銀四千兩應於新運錢糧內坐扣本年共應扣銀六萬五千四百一十兩零茲據該撫奏江西漕船疲乏若儘數照扣未免辦運無資加恩著照所請上年借領天津道庫銀兩准其分作三年扣清每年扣銀一萬三千四百三十兩零同上年在通庫借領銀四千兩江南總局應扣二限銀三千七百五十二兩零卽於本年新運錢糧內分別照數照限扣解其司庫墊款准其暫緩一年俟下年起扣以紓丁力

道光九年七月戊午

上諭內閣御史王贈芳奏會匪鹽梟蔓延滋害請嚴飭捕剿一摺會匪鹽梟最爲地方之害據該御史奏江西吉安府屬泰和萬安等縣向爲私梟出沒之所加以會匪繁多與私梟合

而爲一或名添弟會或名添刀會又稱千刀會均自南嶺延入吉安其初猶知畏法近來黨與日多地方官懼滋事端惟思苟且調停卽釀成巨案猶復一味姑息草草了結甚有鄉勇擎獲送官之匪徒仍從寬免縱之歸家似此遷懦因循化大爲小不過規避處分而縱匪養奸爲害日深必應明定考成以靖地方而安良善著蔣攸銛韓文綺通飭所屬各就地面嚴密躡緝遇有此項匪徒立卽弋獲明正典刑毋稍輕縱沿河添設巡船專捕劫盜盡法處治其實由挾制入會者取具族鄰切結准其自首若能縛送積惡首匪仍予重賞其匪徒繁多之處責成明練有爲之員撫勦兼施毋許稍有諱飾如果實力奉行地方肅清舊任準免處分新任卽予遷擢倘有仍前將就了事者立卽嚴行叅奏加等懲處不稍寬貸

道光九年七月壬午

上諭軍機大臣等御史王贈芳奏請飭禁奸徒牟利開礦一摺
據稱江西袁州府宜春縣石圍山間有銅鉛砂苗奸民詭傳
銀礦妄思開採前於嘉慶二十五年道光元年有生員林森
等價買此山赴地方官具呈後詐稱官准試採蠱惑鄉愚經
前任巡撫嚴飭府縣查拏封禁今聞有瑞州府上高縣生員
陳泰來於上年八月赴提督衙門具呈開礦經提督衙門批
各江西巡撫查覆陳泰來回至江省輒敢以京控批准爲名
議定股分開採銀礦各府屬有受其愚弄捐貲入股者自數
百兩至數千兩不等儻不迅速嚴禁誠恐招集無賴貽害將
來等語奸民牟利惑眾最爲地方之害該縣石圍山本經封
禁豈可任其復行開採著蔣攸銛韓文綺迅飭該府縣嚴查

禁止生員陳泰來赴京具呈指稱批准是否實有其事並現在曾否聚眾開空著查明據實具奏不可稍有枉縱至該御史奏稱袁州府萍鄉縣湖塘地方有葉絲沖山亦有礦苗著該督撫一併飭屬嚴切查禁永除後患勿許偷探

道光十年二月丁丑

上諭軍機大臣等御史程煥采奏稱江西南安府屬之上猶縣有營前水安二處僻處山巖道途險峻居民別無生業惟以燒炭鑄鐵營生俗尚頑悍向爲奸宄藏匿之區近來會匪叢集糾黨聯名毫無顧忌且妄布邪言諸多狂悖愚民被其欺誘稍知退避者又復藉勢脅從肆行搶劫往來行旅及本處鋪戶無不受其擾累等語前因江西吉安府屬泰和萬安等縣私梟會匪爲害地方曾經降旨飭諭蔣攸銛等通飭嚴緝

茲據該御史所奏較泰和等處爲害滋甚著吳光悅委員確
查如有會匪糾約肆劫卽飭屬認真查拏淨盡嚴行懲辦勿
任養癰貽患又據該御史另摺奏稱吉安府知府劉體重出
示嚴禁匪徒賊盜責成鄉約留心察訪該鄉約等藉稱官有
此禁遂爾武斷鄉曲欺嚇愚民聚眾斂錢私立公所卽張掛
該府告示並於告示中蓋用鄉約某人鈐記且有大鄉約副
鄉約之名互相勾結有指爲偷竊者輒於公所用刑審訊且
將篾簍包裹沈入深潭更難保無誣枉無辜及挾嫌致斃情
事等語各州縣設立鄉約原爲約束鄉里稽察牌保如有盜
竊及不法匪徒卽應送官究治豈得擅行處斷著吳光悅察
訪該鄉約等有無藉詞擾害及致斃人命之事如有前項情
弊立卽嚴拏懲辦並飭所屬於派充鄉約時慎加遴選以資

董勸而靖閭閻

道光十年三月壬子

上諭內閣蔣攸銛等奏審訊屢請試採禁山之廩生並嚴定章程禁止開採一摺此案上高縣廩生陳泰來屢請試採封禁山場礦苗且將原勘有礙居民田廬之山捏詞呈控雖訊無惑眾捐資情事殊屬申訴不實事在赦前准其免罪著卽將廩生斥革不准開復以示懲儆生員林森及借銀之羅作棟均不知情著免其置議至宜春縣所轄登埠裏及毗連之松樹壁韓婆坳棚卜裏等山萍鄉縣所轄之葉絲沖山著概行永遠封禁不准開採卽照該督等所定章程責成該管文武各員嚴行稽查結報如有匪徒偷窺情弊立卽嚴拏懲辦倘該管員弁巡察不力該管上司結報不實卽行叅處

道光十年四月庚辰

上諭內閣江西南安贛州二府所屬廳縣界連閩粵民情獷悍
前經該撫以該地方拜會搶劫訛詐逞兇之案層見疊出請
加重治罪當交刑部速議茲據議如所奏辦理著照所議嗣
後南安贛州二府所屬地方如有拜會搶劫訛詐等案除實
犯死罪及外遺爲奴罪無可加並捆人勒贖已照閩粵兩省
之例問擬均各照舊例辦理外其餘軍流以下各犯均於本
罪上加一等定擬該省現獲各案犯卽照新定章程辦理以
示懲儆該撫當嚴督所屬認真稽察究辦俟數年後此風稍
息再行奏復舊例

道光十年閏四月壬子

上諭軍機大臣等據給事中牛鑑奏稱江西省南贛會匪首犯

兇橫狡黠遇有恆產之人能知法度不肯附和入會者非劫
奪牛馬卽蹂躪田禾甚至搶掠子女勒銀取贖小民被其凌
逼不入會則禍不旋踵無以保其身家入會不過斂給銀錢
猶可免其荼毒以是畏禍之心甚於畏法脅之者愈甚從之
者愈多迨至官司遇案訪拏此等被脅入會者本係柔懦愚
民一經緝捕無不立時就獲而實係爲匪之積惡要犯往往
勾連兵役交結吏胥聲息相通聞風遁匿及至事寢回歸益
復肆行無忌現聞該省委員拏獲之犯已有四五百人其未
經解省報斃者又不下二百人是各犯案情未定而株連民
命已多且恐所獲之犯仍多被脅而該處積惡首匪依然避
迹遠颺該委員等於疑似之犯隨意搜捕沿途拖斃難保無
邀功希賞情弊請飭嚴拏首惡等語江西南贛匪徒前據該

撫奏獲匪犯多名現在嚴訊犯供有無積惡首匪在內其餘甘心入會者若干被脅從者若干是否解省報斃者有二百名之多著吳光悅將所獲各犯親提研鞫嚴究首惡姓名蹤迹按名擒捕淨盡其實係被脅從並未爲匪者酌從寬減務期地方肅清勿任委員株連擾累

道光十年六月丁未

上諭軍機大臣等據吳光悅奏改議江西巡河章程節省經費並蔣攸銛等奏捐廉津貼南贛二府所屬廳縣以資辦公各一摺並將每年酌提公項及捐廉銀數開單呈覽江西河道綿長爲數省通津每有匪類沿河搶劫節經奏明設立巡船等給委員等緝捕經費茲該督等以前議章程未妥復行酌改並議每年酌提公項自巡撫以下分別捐廉津貼各官額

設養廉原爲辦公之用巡撫司道係屬大員每年酌捐養廉津貼尙無不可至府縣所得養廉本屬無多若令每年按缺幫捐銀兩歲以爲常誠恐各府縣有所藉口致不肖之員指端婪索實難望其潔已奉公且捐給多款若不認真辦理亦徒飽吏胥私橐轉致日久廢弛於捕務仍屬有名無實該處緝捕經費係屬年例應給之項必須經久可行方無流弊該督等熟籌妥議章程具奏

道光十年七月丁巳

上諭內閣前因兩江總督兼轄江西相距遙遠恐有鞭長莫及之勢降旨令大學士九卿會議具奏茲據托津等奏不歸總督兼轄並無格礙曹振鏞等奏請將兼轄之處仍循其舊松筠並於會議摺外另摺具奏朕詳加披閱所議均屬明晰惟

江西地方武備尤爲緊要曹振鏞等查明兩江總督兼轄三省兵額幾至七萬巡撫專任江西合撫鎮標營兵額僅止一萬二千數百名除留防省城各府州縣倉庫各標營防汛外兩鎮可調官兵不過數千名儻遇應行水陸分道並進實慮兵力不敷總督若不兼轄該巡撫必須一面具奏一面咨調鄰省官兵臨事耽延時日所關甚鉅兩江總督兼轄原爲控制以期聯絡聲勢徵調官兵呼應較靈所有江西一省著仍循其舊統歸兩江總督兼轄毋庸另議更改

道光十年八月戊申

上諭軍機大臣等吳光悅奏改議江西巡河經費毋庸令府縣捐廉一摺江西南贛二府所屬廳縣緝捕經費前據蔣攸鋗等酌議捐廉津貼朕以府縣所得養廉無多每年按缺幫貼

難望其潔已奉公諭令另行籌議茲據該撫奏各府縣分捐銀兩將來更換有所藉口易滋流弊所有前議府縣捐廉之處著無庸議至巡河章程著仍照該撫前奏酌改俾節糜費以專責成其每年節省巡費及鹽務公項餘銀巡撫司道捐項共銀一萬二千一百兩著照所請分別撥給南安贛州所屬廳縣仍將銀兩解存各府庫遇有應辦之案視獲犯之多寡按道路之遠近隨案酌給覈實開銷嗣後務當認真妥辦不得令吏胥作弊混徒飽私橐日久廢弛於捕務仍屬有名無

寶

道光十年九月辛巳

上諭軍機大臣等寄諭江西巡撫吳光悅有人條奏江西吉安府屬之萬安縣爲水陸要道凡由廣東至南安贛州而下者

必經該處行走向設有查鹽快船派差巡邏以防私梟過境
近來差役等於私鹽船隻每得錢賣放而於過往客商之查
無鹽斤輒將衣箱貨物傾囊倒籃任意盤折箱內銀兩肆行
搶奪復向每人各索查看錢數千至十數千不等客商赴縣
控告該差役豫將私鹽安置縣堂誣指夾帶眾役一詞不容
分辯且添出衙門書差人等勒索規錢使商民受罪含冤資
本蕩然以故商賈吞聲畏如狼虎等語地方設立查鹽快船
原以杜絕私梟非爲盤查行旅若如所奏情形差役等藉端
滋擾誣陷善良是私鹽得以安然過境而過客反受害無窮
豈不大干法紀一處如此恐他處亦所不免著該撫密加訪
察嚴飭所屬有鹽卡地方官實力查拏如有前項差役擾害
立即拏獲嚴辦儻仍前怠忽任令差役恣橫商民被累一經

江西通志卷第十三
發覺必當從重懲處決不寬貸

道光十一年二月甲申

上諭內閣前據御史周作楫奏江西會匪之案每多誣扳妄攀請飭各該族長紳士出結捆送當經降旨令吳光悅體察情形據實覆奏茲據該撫奏稱該省向立族正原係編查保甲良法歷經照辦近年緝獲贛州匪徒多有訪自紳士及由該戶族捆送者惟舉充不得其人又恐轉滋流弊著該撫通飭各屬切實選舉公正族長紳士教誨族眾如有爲匪不法卽行捆送究懲儻因匪黨較多力難擒送亦卽密稟官司嚴拏如有挾私妄誣別情照例坐罪仍責成地方文武各官一有各項匪徒竊發先行派撥兵役實力堵拏不得藉有族長紳士捆送置身事外坐誤事機其獲案各犯實有牽累者許族

長紳士具結保領立時訊釋以靖閭閻而安良善

道光十一年五月己未

上諭內閣陶澍奏籌議糧船夾帶私鹽請扼要稽查一摺江西湖南湖北安徽等省軍船往往於回空時夾帶私鹽必應嚴行查禁據陶澍奏天津一帶于家堡楊柳青獨流等處及滄州之甄河地方現經直隸委員巡查著琦善嚴飭該員等查拏私艇堵截囤販有犯必懲以杜透漏迨入江南地界著該督派委徐州鎮道大員嚴密巡查兼防河北漏私至楊莊勾水起卸渡黃後應於揚州之接鹽廳停泊待查惟該處河道窄隘易致阻礙行船著該督酌派文武員弁量擇上游河道稍寬之處照例搜查隨查隨放如有例外夾帶鹽斤悉行起除根究出本貿鹽之風客加等嚴治幫弁旗丁一併叅懲至

駛出大江以後著將瓜洲儀徵搜查委員派至九江蕪湖等處會同各該關監督按船嚴查所有水手人等向遇搜查嚴緊輒棄船四散以圖挾制委員恐誤歸次往往敷衍了事遂至肆無忌憚自應申明定例一船之內丁舵爲主水手有犯責在旗丁如有逃匿一面嚴拏究懲一面督飭弁丁另雇水手駕船趕幫受兌不致有誤當督飭所屬認真稽查俾糧私淨盡以清弊源而收實效

道光十一年五月癸亥

上諭內閣吳光悅奏審擬已革巡檢稟訐該廳歷任侵挪流抵徵收錢漕一摺此案江西前任蓮花廳已革巡檢馮懷稟訐該廳歷任徵收錢漕有侵挪流抵情弊據該撫查明該廳地瘠民貧額徵漕米每多延欠歷任廳員因兌限緊迫動用庫

銀買米補足墊完尙爲急公起見原有民欠可抵與實在侵
挪不同現計民欠積年漕米共七千三十三石零均係廣宣
張德元何錫光李蔭樞各任內經徵該員等以民欠漕米抵
原挪庫款較之市價實共浮抵銀七千八百九十兩零本應
照挪移例叅革治罪惟挪墊悉出因公浮抵實由暗累並非
有心虧短且官非一任事閱多年著加恩暫免治罪於原挪
之廣宣張德元何錫光李蔭樞各名下追繳數在一千兩以
上者限六個月二千兩以上者限九個月其現任江西之員
以奉旨之日起限已離江西之員以原籍准咨之日起限分
別著追逾限不完現任降調人員革職治罪叅革病故人員
照例於各上司名下分成著賠至徐榮任內並無挪動庫項
及浮抵情事所有該員徐榮及廣宣等原抵民欠漕米自嘉

慶二十三年起至道光九年止共米八千一百一十七石零照例仍應催徵這墊惟該廳被水之後花戶更形貧疲若照例限同時並徵民力實有未逮著准其照江蘇省墊完民欠漕尾作抵庫項限追之案予限三年責成現任之員催追屆期未完著落原墊各員與勒限接徵之員分賠原墊之員酌賠十分之八接徵之員按日酌賠十分之二未完民欠飭令後任照追解司歸補本案飭追無著之款以杜刁民延欠

道光十二年正月甲寅

上諭軍機大臣等據原任江西巡撫吳光悅奏南康府星子縣屬蓼花池爲諸水之匯年久失修沙淤日積經署南康府事南昌府同知霍樹清勘度地勢應於池口東北挑去淤沙疏通溝道並於溝旁起築避沙塹壩添建閘板計需工費銀四

千兩該縣有解存救生田租一項請於此內動給銀四千兩以爲挑疏工費並動支銀一千四百兩發交典商按年一分生息同前任南康府知府狄尙絅原捐租穀以爲每年挑除新淤之用俾數千畝農田得以永資捍衛等語所奏爲農田水利起見自應趕緊挑疏著吳邦慶莅任卽行查明辦理

道光十二年五月庚申

上諭軍機大臣等據陶澍奏江西省上年被水歉收今歲青黃不接糧價稍昂南安贛州兩府地瘠民貧風氣尤悍疊經該撫等酌議平價設法勸糴並就近借穀接濟乃地方棍徒乘此歲荒挾制官長竟敢集眾擁入府堂肆行喧鬧現飭速拏懲辦等語上年江西省被水災區節經降旨加恩賑濟並地方官設法平糴爲民籌食已屬不遺餘力何以南安贛州兩

府偶值糧價稍昂卽有棍徒聚眾擁入府堂喧鬧之事該處民氣强悍棍徒藉荒挾制目無法紀必應嚴行懲辦著陶澍周之琦卽飭藩臬兩司督率該府縣營汛將首從各犯按名查拏務獲從嚴懲治毋任漏網以靖地方而肅法紀

道光十二年閏九月戊戌

上諭軍機大臣等據御史黃爵滋奏江西盜匪繁多臚列各條請飭查辦江西毗連閩廣時有會匪滋擾平時地方官若果認真查辦何至猖獗貽害善良茲據該御史奏稱每邑中無無習教爲匪窩藏盜賊全恃甲長之查報若甲長不端必相隱護宜擇端正有業之戶方准保舉承充設有盜匪不報將該甲長從嚴治罪至佐貳佐雜各官應酌量移駐扼要地界以專責成如錯互接壤之區遇有竊劫各案必互相推諉並

於省郡交界責成同知通判等官州縣交界責成縣巡司等
官務須會同兜捕儻有疏縱牽制一併叅處至於懦弱愚民
當時畏其偏脅如事後首報免其治罪並令地方官嚴切曉
諭士民勿被誘脅又如州縣之減估盜匪之勒贖卽有交通
賊匪之差役指贓勒贖概應嚴禁其各營兵丁交通盜匪無
所不爲應嚴飭武弁認真整頓會匪中糾合黨與眾多應嚴
拏頭目加等治罪不得指乙爲甲顙頷塞責向來私梟盜匪
分爲兩途今則合而爲一徒緝私梟不如力捕盜匪使盜匪
散而私梟可靖以上各條著周之琦體察情形詳悉妥議認
眞辦理務期戢奸禁暴以安善良

道光十三年六月甲辰

上諭軍機大臣等有人陳奏上年江西崇仁河內有南城縣人

裝載客貨被地方棍徒指稱搜米強搶斃命之案臨川李家渡地方亦有搶穀斃命之案宜黃春夏之交飢民待哺甚眾公集資本官給照票往南昌府之吳城鎮買米運至臨川縣之上頓渡地方有棍徒趙春俚傅茂俚邱三百劬等向在該處私立渡頭總關名目倡聚數百人洗搶米船數隻至九十餘石之多迄今首犯無獲案懸不辦等語地方偶遇歉收本處米糧旣少勢必藉資鄰近乃無賴棍徒輒敢藉端阻撓一都設私關數處一關糾暴客多人衙役汎卒勾結爲奸日則明訛夜則搶劫該地方官形同木偶所司何事臨川等縣如此恐惄處亦復不免著周之琦迅飭該縣嚴拏趙春俚傅茂俚邱三百劬等務獲究辦並訪拏崇仁臨川斃命各案按律懲辦以儆刀頑若再玩延致令科道叅奏或經朕別有訪聞

則惟該撫是問

道光十四年十月乙未

上諭軍機大臣等據程祖洛奏稱閩省封禁山坐落浦城崇安二縣境內者皆係高峯峻嶺無路可通必須由江西之上饒廣豐二縣境內尋徑取道方能入山自道光二年江閩兩省會勘定議增汎添兵聲勢已極聯絡且有浦城崇安二縣按月分巡該管道府每季入山會查一次建甯鎮總兵與江西九江鎮總兵每年會哨一次歷年以來附近封禁山地方尙無匪徒出沒擾害之事等語山徑崎嶇之地匪黨最易潛蹤前因有人奏該處楨夫運送行李竟有白晝搶奪之事是以降旨令程祖洛查拏懲辦茲據查明自增汎添兵並分巡會查會哨以後近來尙屬安靜惟此項匪徒聞該處查拏嚴密

則暫行潛藏稍一疏懈未必不復出滋事全在認真偵緝不致日久生懈庶匪徒知所儆畏不敢仍前擾害著陶澍程祖洛周之琦傳諭建甯鎮總兵普陀保九江鎮總兵施聯科於循例會哨之時周厯封禁全山細加搜查如有人迹及砍伐樹椿卽行飛稟以憑會同查辦儻敢視爲具文以致有名無實將來仍有匪徒出沒別滋事端朕惟該督撫總兵等是問凜之慎之

道光十六年二月庚申

上諭軍機大臣等有人奏江西廣信府屬之上饒廣豐等縣福建建甯府屬之崇安浦城松溪等縣浙江處州府屬之龍泉慶元等縣三省毗連之區封禁山內近有一種丐匪盤踞號稱花子會俱係各處無賴之徒成羣結黨擾害居民受其索

詐否則尋釁戕害勒指不休其會有大會首副會首散頭目
等名大會首潛住浙江金華府義烏永康二縣一帶地方行
蹤詭祕四鄉村鎮窮民每多被其誘脅每年五月十三日於
僻野古廟聚會一次蒸擣糯米爲食又名爲餽巴會欲糾眾
詐詐則以竹筷纏紮雞毛上繫銅錢一枚分頭傳示會中人
一見立卽趕往其錢分紅黑白三色以紅者爲最急百里外
聞信一日必至地方官因流丐強索不甚置意且散處各境
此拏彼竄查辦每多掣肘等語此等匪徒糾人結會挨戶斂
錢肆害閭閻毫無忌憚不獨善良受其魚肉愈聚愈眾難保
日久不滋生事端著陶澍程祖洛等嚴飭所屬各該地方官
確訪該匪等姓名住址會同鄰境員弁不分畛域協力搜拏
認真查辦務俾淨絕根株毋滋擾害除莠所以安良但不得

縱容差役藉端生事波及無辜

道光十六年十二月甲子

上諭內閣前據給事中寅德奏江西上高縣已革廩生陳泰來呈報開採宜春縣登埠裏等處銅鉛前任巡撫不願辦理以致宜春等縣諸山所產鐵錫銅鉛匿不具報當降旨著陳鑾據實覆奏茲據該撫查明登埠裏等處山場鉛砂並不暢旺有礙居民田廬且屢次呈報開採俱經降旨概行永遠封禁著陳鑾仍遵前旨曉諭居民毋得妄冀開採以致聚眾耗食滋生事端仍著遵照原定巡防章程嚴行稽查結報如該管員弁巡察不力結報不實著卽嚴叅不貸

道光二十年九月乙卯

上諭內閣錢寶琛奏緝拏煙匪稽查僻路等語閩粵二省游民

販煙竄入江西界內業經該撫飭屬拏獲多名審辦撫州建昌二府係通福建廣東要路建昌府屬廣昌縣白水寨設卡之處尤爲喫緊恐該匪等風聞堵緝繞越小路著九江鎮總兵李錡前往該府察看情形撥兵扼要嚴拏並著查明撫州一帶鄉僻小路分飭各汎卡弁兵梭織巡查此外與閩省連界之鉛山一路由閩繞浙以達江西之廣信玉山一路均關扼要亦著該總兵親往稽查其上饒廣豐二縣所轄之封禁山與閩浙連界地方遼闊最易藏奸向例每歲秋冬之交該總兵會同福建建甯鎮總兵入山巡哨一次著李錡於撫州等處稽查完竣後進山周歷巡察毋令匪徒溷迹至九江鎮所轄地方尙多通閩之路卽著錢寶琛於校閱營伍時順道稽查以靖奸宄而肅禁令

道光二十六年十月壬辰

上諭內閣朕閱看江西省服制情實招冊內藍長仔毆死胞兄
藍木老仔一案唐五古毆死小功兄唐會鵬一案鄒錫昭毆
死大功兄鄒鈞一一案均係死者用刀柄向毆各該犯接住
刀柄求饒死者用力拉奪不期奪回勢猛致刀尖自截殞命
因思期功卑幼毆死尊長罪干斬決念其尙非有心干犯改
爲監候原屬法外之仁斷不容因有此例竟將一切服制重
案率聽案犯狡供移情就例輒轉效尤如出一轍試思死者
旣經用刀向毆豈有授人以柄反使刀尖向內以致自行截
傷且手握刀刃自不如持柄者之得力何以彼此相奪持柄
者轉致鬆手殊非情理設使偶有一案朕尙不能斷其必無
何以一省三案不謀而合顯有裝點情節著吳文鎔將藍長

仔唐五古鄒錫昭三案親提全案人證覆加審訊務得確情
按例定擬具奏本年勾到著刑部將此三起暫行扣除

道光二十七年九月庚寅

上諭內閣戶部奏運弁坐船跨帶木植據江西九江關申報請
飭查禁等語本年湖北三幫漕船例外多帶木植已屬違例
乃該省押運千總坐船兩旁亦各跨帶木植何以禁幫丁包
攬之弊著該督撫卽向九江關查明該幫千總何員違例據
實嚴叅嗣後並著各該省督撫及漕運總督於漕船出運經
過之時實力稽查嚴行禁革如仍有漕船及幫弁坐船違例
私帶貨木者卽著從嚴叅辦以肅漕政該督等若不肯實力
辦公何以表率屬員天良安在耶

道光二十九年閏四月甲戌江西九江關監督士魁奏

製造瓷器名目件數

上諭勾除者十六項自本年永停燒造此冊發往九江關監督衙門作爲交代從前按節令按花文之鄙例再不能除些小事尙然如是可恨可惡之至總之有用之物不嫌其多繁文世俗必當力屏初不在數十種瓷器也

道光二十九年閏四月乙未

上諭內閣德誠吳鍾駿奏江西幫呈出浮費款目請旨嚴禁等語各省漕糧撥船向係天津通永二道經管惟江西幫路遠時遲每年軍船不能到塘撥運浮費較他省爲尤甚著訥爾經額嚴飭該道等認真查禁永遠革除儻有徇隱卽行嚴參毋稍姑容至經紀起卸漕糧除每袋例給箇兒錢文外原不准分毫多取今旣查有浮費恐不獨江西一省爲然並著德

誠等督同坐糧廳隨時查訪務期有犯必懲以肅漕政

江西通志卷首之三